



Motorafgiftimut suliassat, allaffissornikkut, akiliisitsisarnermullu akisussaaffik kommunenut tunniunneqarpat sutigut sumiiffinni iluaqutaasinnaanersut pillugu Inatsisartunut apeqquteqaat aallaavigalugu oqallisissiaq.

(Inatsisartunut ilaasortaq Aqqalu C. Jerimiassen, Atassut)

Inatsisartunut ilaasortaq Aqqalu C. Jerimiassen siunnersuummut qujanaq.

Demokraatinut pingaartuuvoq, pisortat allaffissornermut aningaasartuutaasa apparnissaat. Aningaasat amerlavallaat allaffissornermut atorpagut – aningaasat akileraarutit appartinnissaanut, akitsuutit appartinnissaanut inuunerissaarnissamullu pitsanngorsaatissatut atorneqarsinnaagaluartut. Ersissutigaaara, siunnersuutip uuma piviusunngortinnera allaffissornermut aningaasartuutit qaffannerannik kinguneqassasoq.

Tamanna pissuteqarpoq, motorafgiftimut tunngasunut allaffissornikkut suliassat ullumikkut Namminersorlutik Oqartussani inunnik marlunnik ukiumut suliarineqartarmata. Tamanna kommuninut tallimanut tunniunneqassagaluarpat, pinngitsoorneqarsinnaanngilaq, kommunit katillugu inuit marluk ukiumut sulitissinnaassagaat.

Taakkulu saniatigut silatusaarnerussagatinneqarluni suliassaq Akileraartarnermut Aqutsisoqarfimmiippat, immikkut ilisimasaqartut annaassannginnatsigit, sulisut nikerassagaluarpata.

Pitsaaqutai takujuminaatsittorujussuuakka kommuni suliamik tigusissappat. Kommunit isertitaat qaffassanngillat, motorafgiftimit isertitat kommunit bloktilskudiannit ilanngaatigineqaannartussaammata. Akerlianik kommunit aningaasaqarniarnerat ajorseriartussaavoq, allaffissornermut aningaasanik atuisussaammata.

Tassalu Demokraatit oqallinnermut isummersuutigigallagaat.